

Bajet paling besar dalam sejarah

Sebagai persediaan menghadapi cabaran getir ekonomi tahun depan

Oleh FARAH SHAZWANI ALI
KUALA LUMPUR

Kerajaan membentangkan bajet terbesar dalam sejarah, yang disifatkan mampu menjadi penawar kepada ekonomi negara bagi menghadapi cabaran yang lebih getir pada tahun hadapan.

Menteri Kewangan, Tengku Datuk Seri Zafrul Tengku Abdul Aziz dalam pembentangan Bajet 2023 di Dewan Rakyat pada Jumaat berkata, dengan cabaran faktor-faktor global luaran, peruntukan sebanyak RM372.3 bilion oleh kerajaan diharap mampu menjadi dahan teguh bagi pautan rakyat yang memerlukan.

Menurutnya, sekalipun Covid-19 belum reda, dunia telah pun keluar daripada lesu, sementara Malaysia sudah bergerak ke fasa peralihan endemik.

“Walau betapa deras samudera yang telah ditempuh, hakikatnya kerajaan meneliti dan merancang teliti. Namun, masih ada yang mencanangkan kegusaran dan menyebarkan berita berniat mencetuskan kebimbangan.

“Sememangnya diakui, situasi ekonomi global masih perlukan kita sentiasa berwaspada.

“Kemungkinan pergolakan dalam geopolitik dunia dan penurunan pertumbuhan ekonomi dunia pastinya menuntut setiap negara, bukan sahaja Malaysia, untuk bersedia anjal menghadapi sebarang kemungkinan,” katanya.

Tambah Tengku Zafrul, bajet kali ini bertemakan ‘Keluarga Malaysia, Makmur Bersama’ dan bersandarkan tiga teras fokus iaitu kesejahteraan rakyat, kelangsungan perniagaan, kemakmuran ekonomi dan kecakapan perkhidmatan kerajaan.

Berbekalkan ruang fiskal yang ada, keutamaan bajet kali ini katanya, akan tertumpu kepada usaha melindungi kebajikan rakyat, dengan lebih 100 inisiatif rakyat akan direalisasikan sebagai sebahagian usaha.

“Daripada jumlah keseluruhan peruntukan, kerajaan bercadang menyediakan RM272.3 bilion bagi belanja mengurus, RM95 bilion untuk belanja pembangunan dan RM5 bilion di bawah Kumpulan Wang Covid-19.

“Sejumlah RM2 bilion turut disediakan sebagai simpanan luar jangka,” ujar beliau.

Tengku Zafrul berkata, Bajet 2023 akan dipandu oleh 3R – iaitu *Responsive* (responsif), *Responsible* (bertanggungjawab) dan *Reformist* (reformis).

Jelasnya, ia responsif kepada sebarang cabaran, melalui bantuan yang komprehensif kepada Keluarga Malaysia, bukan sekadar kumpulan B40 tetapi juga M40, wanita, belia, orang kurang upaya (OKU) dan semua segmen masyarakat.



Tengku Zafrul mengiringi Ismail Sabri ketika hadir ke Parlimen pada Jumaat bagi membentangkan Bajet 2023.

Selain itu, ia bertanggungjawab untuk mengimbangi dasar fiskal yang mengembang dengan melaksanakan pembaharuan fiskal ke arah kemapanan kewangan kerajaan dalam jangka panjang.

Bajet 2023 juga bersifat reformis yang mengambil peluang mengubah landskap pembangunan negara agar lebih inklusif dan mapan, di samping menyokong industri negara yang kukuh melalui pelaburan strategik.

“Marilah kita nilaikan beberapa petunjuk dan angka berkenaan situasi ekonomi negara. Bermula dengan penguncupan 4.5 peratus pada suku ketiga 2021, ekonomi negara telah kembali berkembang 3.6 peratus bagi suku keempat 2021.

“Ia terus mengukuh lima peratus pada suku pertama 2022

dan kini melonjak 8.9 peratus bagi suku kedua 2022. Pertumbuhan suku kedua tahun ini merupakan pencapaian terbaik di Asia Tenggara.

“Momentum pertumbuhan ekonomi dijangka berterusan, malah lebih mengukuh bagi suku ketiga 2022. Insyaa-ALLAH, ekonomi negara dijangka berkembang lebih baik daripada unjuran Mac lalu antara 5.3 hingga 6.3 peratus.

“Dengan indikator ekonomi yang terus menyokong trend pertumbuhan, kerajaan menyemak semula unjuran Keluaran Dalam Negara Kasar (KDNK 2022) kepada antara 6.5 hingga 7 peratus,” ujarnya.

Jelas Tengku Zafrul, sebagai sebuah negara yang mengamalkan ekonomi terbuka, Malaysia tidak boleh lari daripada tempias

JUMLAH PERUNTUKAN BELANJAWAN NEGARA (2005-2023)

Tahun	Peruntukan
2005	RM117.4 bilion
2006	RM136.8 bilion
2007	RM159.4 bilion
2008	RM176.9 bilion
2009	RM207.9 bilion
2010	RM191.5 bilion
2011	RM212 bilion
2012	RM232.8 bilion
2013	RM251.6 bilion
2014	RM264.2 bilion
2015	RM273.9 bilion
2016	RM267.2 bilion
2017	RM260.8 bilion
2018	RM280.25 bilion
2019	RM314.5 bilion
2020	RM297 bilion
2021	RM322.5 bilion
2022	RM332.1 bilion
2023	RM372.3 bilion

perkembangan global yang kian mencabar ini.

Maka, kadar pertumbuhan ekonomi negara bagi tahun 2023 dijangka menyederhana iaitu antara 4 hingga 5 peratus.

“Bajet 2023 ini diharap dapat menjadi penawar seterusnya kepada pelbagai keperihan yang dialami rakyat buat masa ini. Moga-moga ia dapat terus meneruskan jalan ke hari esok, di mana insyaa-ALLAH, menanti masa depan yang lebih cerah.

“Saya menyeru marilah sama mendukung bajet ini. Di bawahnya berteduh impian, terpancar harapan lebih 32 juta rakyat Malaysia,” ujarnya.